

乾隆歷城縣志

歷城縣志卷第二十二

藝文考四

集部三

國朝

葉承宗灤函集十卷

承宗閉戶著書里閭罕覩其面一時學者翕然宗之

如遷社郢社皆推盟主焉工南北詞曲號灤湄嘯史

灤函第十卷皆雜曲也

山左詩鈔

少陵詩選六卷

見灤函集

承宗自序曰杜少陵冠冕當代駕軼古今遂使詩壇

月旦莫贊一詞至推為姬公制作不可擬議而近世
王聖俞氏廼擬以鐵樹花開風骨嚴秀空王獅吼法
力沉雄是則然矣若猶未也然則少陵亦何道而幾
此將無庫發當陽武繩膳部家學有淵源歟許身稷
契婉技楊曹祈鵠有正鵠歟堽簾青蓮桴鼓摩詰麗
澤有沾漑歟其或州有九歷其七岳有五游其三山
川映發其靈襟歟一飯必念黎元在險不忘君父忠
愛激勃其元音歟抑亦登高則吹臺來萬里之風履
險則衡岳阻經旬之水其豪襟逸氣有以抒寫其天
籟歟義激則房琯可掬意忤則嚴武可瞋其浩氣正

性有以披瀝其孤韻歟自非然者則少陵又何道而
幾此乃少陵則固嘗自言之矣曰讀書破萬卷下筆
如有神蓋惟博綜羣籍傍覽衆長優游而求饜飮而
得左無不宜右無不有是故岱華洞庭可以揚其鉅
麗矣而鐵堂石龕亦可以歌其險仄宛馬蒼鷹可以
寫其神駿矣而螢火白燕亦可以體其形容翠管銀
罌可以調其恩澤矣而殘杯冷炙亦可以況其酸辛
曲江典衣可以抒其豪爽矣而羌村秉燭亦可以繪
其驚喜洗兵出塞可以發其奮揚矣而垂老新婚亦
可以道其戚苦長安麗質可以贊其錦綉矣而幽谷

佳人亦可以憐其翠袖良由性耽佳句語必驚人文
足洽神句堪愈病光燄萬丈衣被羣英豈偶然哉以
故唐人選唐李杜不與沿及近代厥有選家大抵意
主風格者挹其雄勁而畧其俊逸愛存韻度者擷其
新奇而棄其沉渾余小子欣賞珍抄意無時獨刪三
之一都為六卷嗟夫作家匪易尚論良難一少陵也
或信以為史或尊以為聖乃亦有摘其句累惜其意
盡譏其無韻之言未工至有直目為吾家莽夫子者
人各有心吾從所好予惟知金鑄賈島絲繡平原朝
夕手一編而已

記珠

見縣志集卷未詳

承宗自序曰博徵奪簞善據銓官豈正博物天授無亦彊識之力居多云學迄中身聽受善忘撫函躍爾釋卷茫然憶其事而不能舉其辭屬其辭而不能指其名識其名若辭而不能悉其地若代秦淮海所由自勗也豈得孤恃領新頻遺蓄素藉畧觀大意不求甚解以自覆哉矧余小子近多旅遊願奢而識短意寄而帙逸不藉子黑馬資洽聞乃著珠玉聊當弦佩猶記開元中有人遺張說以紺色珠或有闕亡之事以手持弄此珠便覺心神開悟一無所忘因名為記

事珠余乃撮所舊聞統名茲義而或以零璣瓌珎無
當徑寸為嘲者夫蛟人泣綃何必異驪龍領下哉為
而貫之大小珠可一綫穿也神而明之牟尼珠照清
水源也遂朝夕持而弄之不去手

集 樂 函

懷晉文集

卷 未

晉有未粹文集藏於家

府 志

按懷世昌雙親行實載晉漫興詩云不在城兮不
在山飢時喫飯困時眠等閒悟得元中妙勝讀南
華第幾篇又云二十年來歲月深幾番微笑幾番
慙舉頭時見中秋月向在天邊今在身亦擎壤白

沙之遺音也

鍾性樸楠園遺詩一卷

採訪抄本

安致遠序畧曰余辛卯歲年甫踰弱冠受知於學使鍾文子先生及先生宦潯陽歸築室濼源之旁而老焉既歿而長公德興以行實至余為詩以哭固未見德興也迨丙寅秋余遊歷下則德興又早世得晤其弟聖興呼德興子出拜三十年師友存亡之感為之愴然次日手一編示余曰此先君子楠園遺詩也先君子著述多散佚茲搜葺古今體得三百餘首子其刪定余受而卒業曰嗟乎先生宦轍徧於吳楚巴蜀

齊魯間於當世之名卿鉅公無不交當其身何不彙
集成帙俾一時貴而能文者序之以廣其傳而僅置
敝篋中以俟之德輿德輿英才積學所交多名流又
不幸中道挫折而又以留之聖輿輿抱先世之遺
書痛哲兄之不祿溯江南抵燕臺所徵誌傳紀叙皆
當代耆碩而今乃以先生遺詩授之於余豈九京有
知必以三十餘年之遺文留待門下士之迂拙如余
者以為訂正乎先生詩紆徐冲淡徃徃以幽憂之思
寫閒適之趣殆昔人所謂不求工而自工者其逸情
冷韻當孤行於海嶽間則楠園一席地又何必不與

華泉鮑山並有千古哉

拙石集

趙吉徵來根堂詩四卷

見王萃
夢谷集

王士正序曰順治丁酉秋予客濟南時正秋賦諸名
士雲集明湖一日會飲水面亭亭下楊柳千餘株披
拂水際綽約近人葉始微黃乍染秋色若有搖落之
態予悵然有感賦詩四章一時和者數十人又三年
予至廣陵則四詩流傳已久大江南北和者並衆於
是秋柳社詩為藝苑口實矣及余再過歷下訪湖亭
舊游則向之楊柳皆不復存屈指夙昔同游之侶已
烟霏雨散不可復踪跡憶庾子山攀枝折條泣然流

涕之言為之罷酒不樂又二十餘年居京師及門趙
生于蘭攜其尊人君孚先生菜根堂詩卷過予曰先
子固秋柳社中人也予恍然悟前事披其卷則秋柳
四章宛然在焉根觸今昔遂竟其卷先生為人慷慨
負奇氣好交遊已然諾使其得志行道則唐郭代公
宋張忠定一流不足多讓顧連蹇公車晚知楚之應
山以歿其詩雖不以尋摘章句取媚當世而骯髒之
氣時勃鬱呈露於行墨之間誦其詩思其人論其世
要有不可掩者何可令其無傳焉而況今昔之感有
根觸予心而不能忘者耶爰稍為詮次以答于蘭

意而述其緣起如此

帶經堂集

王革後序曰右吾邑應山明府趙鶴山先生萊根堂詩集四卷其仲子磐友於先生卒後二十三年始克裒集遺稿乞新城大司寇公選定批點為序而版行之先生於吾邑為寓公順治初侍其尊君隱居鵲山湖上父子兄弟一門稱詩時與邑中葉進士奕繩王秀才京也為文酒之會倡酬間作嗣音邊李今五十餘年矣邑人為詩日以益衆至詢以先生之詩鮮能舉其章句對青崖之翠發聽水涌之如輪風流未墜來者為誰予師德州田公論詩絕句有云吾鄉邊李

號前民鈞突泉頭墨蹟新眼底漁洋蠶尾外詩人空
作濟南人蓋有慨焉其言之余妄意學詩垂三十年
茫無究竟然少讀先生尊君迂也亭詩即知嚮往長
而與先生之嗣子及諸羣從游因知吾邑五十餘年
之詩乃權輿於先生而上接邊李之緒言實藉茲集
磐友能於傭經奉母拮据況瘁之餘節縮衣食力謀
付梓是集一出不獨於先生為收子且於邑之為詩
者為功臣矣至於先生大節載諸銘傳其詩則新城
公論之已詳余固無庸趣舉而獨謂吾邑五十餘年
之詩實權輿於先生亦欲邑之攻詩者先河後海無

忘所自而更欲與之共勉斯道磨探遷革暴練糾織
以追踪邊李庶幾人人有集勿徒空作濟南人如田
公詩所云也康熙甲申春正月丁卯

夢谷集

孫光祀膽餘軒集八冊

據本

魏希徵序畧曰先生為孝廉時遭鄉里之難銜父兄
大讎志氣精誠貫日月而泣鬼神卒申大義於天下
自通籍後由詞臣而諫垣洊歷清要前後在朝三十
年蹇蹇諤諤無一言一事不期於國計民生有補故
其文章根忠孝磊落之性以發為昌明俊偉之詞則
先生之傳於天下者獨文也乎哉

鄭績善金川集三卷

採訪抄本

朱宏祚清忠堂奏疏四冊

據本書

龔應霖序畧曰唐虞三代之時或君臣相誥誡或同列相勸勉以至訓俗型方治官立政今讀其書一言不為少數百千言不為多非後之儒者所可及蓋因政事而著為文章此其所以可垂於不朽也三代而後人才不古若於是政事文章離而為二往余受知於福山王先生每首推大中丞高唐朱公福山於時少許可余因是知公之賢公以縣令卓異洊歷郎署觀察天津道晉直隸守道司財賦清績惠政不可

勝數康熙二十六年冬起擢公鎮撫粵東粵界居嶺
海之表其郡縣鉅京師遠者萬有餘里近亦六七千
里官斯土者率縱恣情弛不以職業為急朝廷之德
意難於下達草野之疾痛壅於上聞三十餘年以來
前苦於藩焰後苦於兵烽又不得清明英幹之大臣
整率而噢咻之吏之廉者無以勸貪者無以懲不急
之役百出而不知止無名之征日增而不知減萑苻
不靖獄訟繁興凡刑名錢穀鹽榷之政蠹叢弊積相
習為固然而莫知爬搔剔之術公自辭國門輕裝
就道舟抵大庾嶺下即嚴南雄泝夫之禁勒石道旁

繼而布告列郡盡罷無藝之賦給散軍糈計其道里
之遠近水陸之難易令各就其近且易者閭閻無飛
輓之勞士馬有飽騰之氣而粵之積困一甦予既從
福山先生游今又居公之宇被公之澤及假歸謁公
一見如舊出其奏疏文告告示各若干卷問序於余
余受而讀之其奏疏剴摯詳明委婉曲當其文告引
繩墨切事情利害得失是非可否如燭照數計令聞
者悚然以懼怡然以解其告示丁寧周至忠厚悱惻
溢於言表雖窮谷深山耕夫織婦無不聽之而感動
然則公之文豈非所謂政事文章兼而有之者與

同上

黃震青龍標詩集

見古懽堂集卷未詳

按山左詩鈔云震青有遺詩一卷集唐一卷亦非其全也

田雯序曰余少時曾識龍標於濟南不知其能詩也距今四十餘年得其詩讀之龍標亡矣龍標之詩矜聲調芟繁蕪不脫齊音間作楚些大率多宛轉沉吟侘傺悲怨之作如雍門之琴子野之笛荆山之泣也今夫人之傳殆有幸焉龍標才氣騰踔睥睨羣流特以遭遇迤邐故其詞傷其志瘁而磊落不羈之概猶浮動毫楮間比之王右丞凝碧管絃詩益妍妙未減

才人曠致矣聞其晚年以著書自娛有時徵朋呼酒
蠟枝命遊弔琅琊之荒臺慨牛山之禿樹徜徉歌嘯
濯色磨光嗟乎龍標文采風流藉以不墜蓋有詩篇
存耳詎非幸與余昔在武昌同葉井叔觀李伯時畫
唐平陽柴氏主臨渭水上靚妝戎服開幕府草木旌
旗山川映帶想見清渭照軍容秦王為之動色時也

龍標詩境庶幾似之

古懽堂集

鍾輟載園遺詩一卷

採訪本

鈞湖集一卷

同上

趙子京序畧曰自太白之菩薩蠻香山之汴水流以

及清平調竹枝詞諸曲開詞源宗派而有宋諸家遂
各擅絕技世之粗才鈍根或病馬是烏足與語哉歷
下固古今詞藪也稼軒老子以野鶴性情發為齊音
橫放豪邁與蘇爭旗幟亦已偉矣而易安一女子
晚而視之當其細雨斜風倚欄凝睇皆不敢與爭衡
子以為其樂無以易焉今去宋幾五百年而山川泉
石烟雲花鳥無一人羅而有之豈非天壤一恨事耶
戴園嘯詠此土追辛李遺風今讀其集婉婉而娟麗
頻挫而紆鬱則其樂固兼勿安易安而有之矣視世
之豪家子為何如哉

同上

鍾輅蒙木集一卷

採訪抄本

王士正序曰才之不能相兼也自古然矣謝之不為
陶也顏之不能為謝也以迨李杜韓孟之徒莫不皆
然有人於此能為陶之古澹又能為謝之清華能為
謝之初日芙蓉又能為顏之鏤金錯采不謂之通才
得乎歷下自邊李而後風流銷歇近百年未有繼起
而舉其墜緒者予竊疑之海右此亭古濟南名士多
此非子美氏之言乎金與玉函之山灤源歷泉之水
如空青海綠金膏水碧終古不改所謂濟南山水天
下無者今猶昔也而何人物盛衰頓異若此丙寅

卯間子方里居鍾子聖與與趙子豐原王子秋史先
後來從遊三子之才頡頏上下類能貿然自拔於流
俗子甚異之非濟南山水之奇曠百年一發之而何
以有是會予兒洊賦西城別墅詩十二章和者逾百
家而鍾子詩最奇特峻峭似孟東野又數年乙亥鍾
子來遊京師偶賦豐臺芍藥詩四章竿牒清麗一時
盛傳之又似西昆三十六體噫嘻何其才之兼也李
習之曰讀春秋如未嘗有詩讀詩如未嘗有易讀莊
周屈原如未嘗有六經故曰創意造言各不相師今
鍾子一人之言耳讀西城詩如未嘗有豐臺也讀豐

臺詩如未嘗有西城也刻意造言在已出者已不肯雷同如是矧其於古人而肯為勦襲為苟同乎信乎其才之兼也鍾子為吾師文子先生之子先生以廉吏著順治中歿二十餘年而鍾子不免為宴人有才如此廉吏之後勝綺襦紈袴多矣

鍾子集

謝重輝序曰夫為詩當自名家然後可傳於不朽若體規畫圓準方作矩終為他人臣僕而已烏能傳哉詩也者至變者也古之人各極其才而盡其變以唐言之李杜高岑王孟龍標東川常建劉春虛崔顥陶翰之徒其變化若神龍之不可羈蒼素之殊色迨貞

元元和而後元白之淺也惟患其入而郊島則惟患其不入矣韋柳之冲也惟患其盡而籍建則惟患其不盡矣退之抗之以為詰屈長吉探之以為幽險樊川之豪健玉溪之奇麗皮陸之邃奧雕琢皆隨時善變不相沿襲不相比擬至於北宋歐梅蘇黃而變極矣近日詞人知沿襲比擬之為病多用偏師而刻鏤聲牙古音浸遠吾濟南士人雅有先輩遺則而鍾子聖輿尤為傑出其詩往往主於情而畧於貌深於變而恥於同庶幾知所以變而不為依傍者歟夫烏之慧也其效人至數語而止善繪人者其肥瘠動靜各

異態焉然至百人技止矣無他皆人言者也非自言
也人貌者也非自貌也今之人既知沿襲比擬之為
病不取楚詞漢魏諸古作而深求之徒見當代二三
作者筆力橫絕句意新奇舉世而效之而不溯其本
源之所在其為沿襲比擬之弊不滋甚與今聖與既
不惡變而尚同去情而悅貌若再充其氣不去獨以
徇衆舍己以從人療偏以造完不益遠乎雖欲勿傳
焉得而勿傳也會其梓詩請序予因述其夙所持論
者以告之同郡謝重輝序

據本

單叔集俟我集

見鍾氏家傳卷末

王革二十四泉草堂詩集十二卷

書 棟木

王士正序曰太史公曰孔子以詩書禮樂教弟子受業身通者七十有二人而語又有之不得中人而與之必也狂狷乎疑與孔子之所以為教者不類何與乃子輿氏申其旨曰如琴張曾皙牧皮者孔子之所謂狂矣其志嚶嚶然曰古之人古之人狂者又不可得欲得不屑不潔之士而與之是獯也自有孟氏之說而聖人之所以為教益大著於後世非獨曾皙原憲之徒然也即如莊周接輿長沮桀溺於陵仲子之流其行事或近於獯要皆為不悖於聖人之道故後

世有傳焉而流俗之人習見夫呶愛僻嚚以為工磨
折周旋以為容與天下滔滔皆是可以干譽而无咎
而苟有一儻蕩連犖不羈之才則以為負俗之累羣
相與非笑之不至於堙鬱輒軼軻其身而不止噫其可
悲也夫狂狷之士不見絕於古之聖人而今乃不容
於流俗無惑乎舉世相率於聲利妍媚之途而不知
所底也秋史自其少已負奔軼之才嗜古好奇視鄉
里間舉無足當其意者類狂閉門苦吟息交絕游類
狷鄉里之人亦遂羣起而譟之秋史自信顧蓋堅田
司寇蒙齋以視江南學休沐歸過歷下偶見其詩急

物色之與相見又盛稱其才始得列名諸生予尤愛其詩有亂泉聲裏誰通殺黃葉林間自著書之句亟稱之於巡撫張中丞南溟中丞因延見講布衣之好於是秋史名字往往在人口然好之者終不敵忌者之衆故坎壈至今秋史之詩骯髒有奇氣不屑一語雷同而趣味澄澹如清沅之貫達與其人絕相似雖忌者不能不心折其工也王道思有言才足用於世賤且貧焉其怨也宜也故言之所倚必出於不平予以爲道思之言亦稍過矣夫知不知命也遇不遇時也老氏不云乎知我者希則貴而又何賤貧之足云

矧不必以賤貧終乎秋史但自信其狂者狷者而窮達勿變焉他日人與詩兩無負矣

續集

田雯序曰二十四泉草堂者王生秋史書屋也依歷下城西郭沿射圃上千佛山脚才二里屋前後蔬畦茨塘流水映帶牆外老柳數株蒼皮空腔高垂屋頂長條踈地茆茨鐙火吟詩聲與泉聲爭響即其處也泉曰望水明殷棠川相國築川上精舍於此園中簷簷綵簷以萬竿計今竹已盡大石猶存王生數椽在焉得葺屋詩四章句云百年竟落書生手滿郡猶呼閣老亭是也曾南豐謂齊多甘泉冠於天下其顯

名者以十數色味皆同蓋灤水之旁出者七十二泉
之名見於齊乘元于欽所編望水泉列第二十四則
其雁次相綴非篤論也余嘗取而閱之趵突芙蓉澗
纓數者而外其名率俚而不雅望水尤俚之甚者于
欽注泉水其辭旨不及鄒道元遠甚而華不注之華
泉明水鎮之淨明泉皆失不錄抑又疎矣今夫詩人
之可傳也百世後并其山川里巷而亦傳之如阮籍
之穀水盧仝之玉川司空圖之王官谷無不割據一
林麓豁洲之勝弗以讓人而詩人讀書之屋亦前後
遞授庸夫俗子不得而托足焉如宋玉故廬則庾子

山居之王右丞輞口山莊乃宋延清舊宅也予每怪
濟南名泉不乏昔詩人邊庭實李于鱗許殿卿輩生
於其鄉曾未聞於某泉之側搜半弓隙地為別墅者
白雪樓在韓倉村或云在鵲橋壘市間無可考獨棠
川先生以相國工詩搜抉望水之奇卜築其上閣老
亭是以傳焉而今古上下偃仰流連落王生秋史之
手此其所以矜喜自負氣足以豪而詩因之日工也
予論生之詩仍以泉喻可乎夫泚然以齋者泉之源
也淪淪而漦漦者泉之波也當夫風雨噴薄水石湍
激之會于猿啼楓落時聞之不啻雍門之琴荆山之

泣有助人淒其而不能自己者生之為詩悲歌慷慨
鬱陶莫釋一往蒼涼蕭瑟侘傺無憀之音彷彿似之
識者嘆為騷體之遺才人之高致矣一變而叶於金
石歸之大雅猶泉之垂溜天紳衆山皆響滙為風潭
萬頃而汗澗卓蹕以放乎江河詎可量哉噫是時秋
也泉之上白雁書天水明木瑟余將欲撰杖草堂掃
殷園之風籜聽佛巖之石雨酒酣濡筆易望水為秋
史泉亦阮曲郎官湖之意殆以洗于飲之陋而補酈
道元之所未注也且並叙其事為王生詩話云

古體
堂集

蓼谷文集四冊

抄本

李文藻序曰歷城王秋史先生歿數十年其縣人周書昌得其文集四巨冊於肆市予因得錄之而重有嘆焉蓋先生以詩受知新城德州兩公名播於天下而知其能文者固少也其文雅潔有法度四六尤新警縱橫皆不亞於其詩而此四冊者出先生手錄更無副本若其後人不鬻焉而以覆瓿糊窻或什襲藏之而蝕於蟬蠹於鼠燬於火糜於屋漏之水則先生之能文終無知者矣又使鬻於不知文者恐仍有數者之患再不幸而遇郭象齊邱其人又必竄為已作則是集之遇書昌謂先生死而無靈其可乎哉其文

須篇著作之年月趙香坡傳及題坐雨圖卷二冊自丙寅至庚子多用意之文書張鹿牀詩後及代黃敬園徵書啟二冊自癸未至乙未多壽序婚啟代人之作又前二冊多散文後二冊多駢體蓋先生自分甲乙如此予題曰蓼谷紀年集甲乙各釐為六卷而書昌將謀以付梓其詩曰二十四泉草堂集久刻於文登于氏安知書昌好事不如于氏耶其文多關濟南掌故他日續志乘必有因其文而顯者是集之遇書昌又非獨先生之幸也乾隆壬午冬至日書於諸城

寓舍

南湖集

李董集鈔一卷

抄本

革自序曰樂安李象先遺文二百四十七篇手鈔其十四篇與董樵遺詩二十三篇排成一卷曰李董集鈔象先之文書論多於各體識解畧類蘇氏少時聞其文學河東今集中無有近于學者何也其得名始於櫟園賴古堂選載其文十許篇出五十餘年矣樵詩清雖絕塵家數則少顧為新城所賞感舊集載其詩江東云江東行殿已荆榛碧瓦苔深有暮燐南渡從官矜上第西清封事主分鄰春風嗚咽鳴珂地寒雨悲涼散蠟辰慚媿子皮終磊落功成甘作布衣人

同安江上云三月同安道桃花夾岸明春風公瑾墓
細雨呂蒙城歸雁書難寄浮鷗意自平可知寒食近
布穀已催耕二詩風味迥與樵異或新城為之與樵
詩不逮象先之文而知樵者衆知象先者希豈櫟園
已遠新城即世未久尚以鉅公之識賞流傳也新城
著書纍纍於樵指陳疊出於象先祇載其知前生事
一語昔諸城劉子羽語予生平未一見漁洋山人予
謂新城有懷君詩子羽泣下後在京師酒間偶誦其
千里名山人客子魂勾新城曰此吾老友夫新城之於
名士如此而象先乃不能得其一顧或曰象先固有

由然也康熙丙申秋七月據本

按此序不見於蓼谷文集因知其集四冊尚非足

本

王經國葭濱遺藁六卷府志

彭鯤躍錦川集見府志

張士驥望禾樓集採訪節抄

按士驥字德也與王秋史遊詩極有風格

連選金門集一卷霸臺集一卷採訪

朱絳雲根清聲山房詩一卷觀稼樓詩二卷楓香集一

卷吳船書屋詩一卷同上

王士正雲根清壑山房詩序曰濟水為瀆發源于王屋入于河溢為滎伏流地中行千里為滎以達于海吾嘗游秦隴之墟觀所為八水者若涇若渭若灃皆水之大者其勢鬱鬱潏潏怒湍急慄疾然皆不得列為瀆蓋涇與六水同入渭渭又入河其力皆不足自致於海故爾雅曰四瀆者發源注海者也朱子子青家濟水之上鄰滎源之堂其嗜古也若汲深然其發而為詩也若涇關而過辨也若大波為瀾而小波為淪也吾屢觀其所為其力蓋足以自致於海者也朱子洵不愧為濟之人已朱子之尊人司馬與子少為同

學朱子又從予遊家世翔賓門有列戟而性僻耽吟
往往與山林樵萃之士爭勝尺寸班孟堅所云在綺
襦紉袴之間非其好也其詩之工也不亦宜乎

帶經堂集

朱彝尊序曰詩猶夫射也棲鵠於侯有參有干矚以
為步龍首蛇交以為福雖為物不同其志於中則一
爾彼其擗三而挾一支左而詘右此夫人而能之也
舉旌以宮偃旌以商三耦八算負侯而唱獲射之必
有節也武夫之糾糾有終身射而不知節者矣或留
焉或揚焉或出於方焉善射者則異是燕角之弧朔
蓬之矢決拾並夾必選其良此猶詩家之取材也六

弓四弩八矢之法參均而九和角與榦權筋三倖膠
三錡縲三邸漆三甦水之以辨其陰陽夾其陰陽以
設比設羽設刃此猶詩家之鍊句也鵠有遠近有高
下則審之在我而已今之言詩者主於宋黃魯直吾
見其太生陸務觀吾見其太縟范致能吾見其弱九
僧四靈吾見其拘楊廷秀鄭德原吾見其俚劉潛夫
方巨山萬里吾見其意之無餘而言之太盡此皆不
成乎鵠者也尤而效之是何異越人之學遠射參天
而發適在五步之內也乎吾家橡村弟善古今詩其
取材必良其練句必極精緻陳言務去而夕秀啟焉

譬諸射者持弓矢審固動而不括必至於彀詩所云
終日射侯而不出正者也橡村貽書索予序書至是
日適觀射於市之南遂取以為喻

味書亭集

田雯楓香集序畧曰子青楓香集一卷寄予讀之其
才高其學異其句之最工者如三間竹子桐孫屋一
尺荷莖蓼穗泥老木晚風聲瑟瑟小花秋焰景垂垂
晴雲錦絮參差出新雁迎風次第飛紅透楓香霜後
葉白開蕎麥晚田花夕陽半露烟中塔黃葉全遮郭
外樓蘆筍乍抽三寸碧柳絲纔放二分黃麥浪翠邊
風舞燕花鬚紅外客騎驢斜日靄明秋雁腹野香花

抱晚蜂腰最愛白雲聯絡處更宜蒼雁兩三行白藕
葯垂經雨重紅蜻蜓出帶香飛殘星數點月將落老
屋一燈門未開流連三復何其新且奇也求之唐人

皮陸劉許集中政不可多得矣

古懽堂集

韓輒桐龍潭書屋詩二卷

採訪抄本

朱綱蒼雪山房稿一卷

採訪刻本

王士正序曰清風肅肅搖窗扉窗前修竹一尺圍紛
紛蒼雪落夏簟冉冉綠霧沾人衣日高山蟬抱葉響
人靜翠羽穿林飛道人絕粒對寒碧為問鶴骨何緣
肥此東坡題西湖壽星院詩也予每讀之輒如入簞

營之谷臨瀟湘之浦而吟嘯於渭川千畝之濱蓋竹
之為物也磊砢多節目森梢負勁質凌霜雪貫四時
而不改柯易葉在草木之中有逸人高士巖棲谷隱
之風焉予嘗遊吳越秦蜀楚粵韓魏之墟經行踰萬
里所至遇人家竹圃必造而觀之或見於山石犖确
川谿曠淼之間未嘗不停驂輟棹徘徊移晷然後去
吾州發地皆泉土最宜竹而植者絕少朱子子驄性
獨好之手種數百竿於讀書之齋與其兄子青日夕
坐卧其下興至則發而為詩此倡彼和甚樂也因名
其齋曰蒼雪而并以名其吟卷殆有取於坡公之詩

云爾間以其詩質於予希聲清越有風篁之韻古色
沉澹有琅玕之操抑揚抗墜有伶倫嶰谷之音其於
竹蓋有類焉者則其命名宜也予固好竹而久居京
師致之不易日對子驄吟卷庶亦可以醫肉食之俗
而慰其所嗜也已武林沈子礪房久游吾門與吾論
詩之指有深契者而子驄受經礪房其以吾言質之
當相視一笑也

蠶尾集

宋弼曰公幼喜為詩與兩兄自相師友晚並進自然
如人影樓邊月蟬聲柳下門黑雲迷遠樹白雨入空
樓皆造老境惜無存稿蒼雪集皆少作也

山左詩鈔

朱綱朱絳朱綱樓華書屋近刻四卷

據本書

按此書為朱氏兄弟合刻本綱集二為嶺南草端

江集絳集亦名嶺南草綱集名濟南草共四種有

梁佩蘭序

趙于京客亭集

見古惟堂集卷末群

田雯序畧曰趙子豐原貫穿六經左史旁及離騷南

華又力探歷代諸大家發為吟咏靡體不工公車來

京師示予客亭集一編光芒動盪莫能迫視然此亦

只其半豹耳昔蘇子瞻見唐人劉夢得竹枝第一篇

嘆曰此奔軼絕塵不可追也予於豐原云然

古惟堂集

書帶堂集

見府志
卷未詳

張文箕肖巖詩集

據採訪
卷未詳

張潛貫珍錄一卷

據本
考

牛元丞序畧曰貫珍錄張幽光藏書也其書不職詳而職要不務作而務述於天人之理倚伏之機善惡之殊禍福之原莫不詳陳備列留心於三綱五常之地寓意於飲食教誨之中即遠近旁搜不越百氏之傳聞而細大不捐蔚為一家之著述

同上

宋云鈇秋巖小詠

見山左詩
鈇卷未詳

金潢過庭初草

見山左詩
鈇卷未詳

黃字虞參山陰人寄籍歷城為運學生有過庭初草

山左
詩鈔

申書升云老友朱子綬婁言金虞參詩因誦其句云
西風驢背沉吟處疎柳殘陽舊板橋芳草精神經暮
雨夕陽魂夢入桃花為之擊節虞參亡無子稿亦散
失偶於友人破麓中得一帙殆一時暇名客未能遽
及者

同上

劉伍寬海右草堂集十二卷

採訪
抄本

桑調元曰劉氏善言情款迭作商謳中年涉歷哀樂
雅欲歸諸溫克不失正聲晚似下邳灑落幽趣騰湧

乃無意學楊朱矣

歷城三子詩序

申士秀序曰予嘗讀王漁洋為王秋史所作二十四泉草堂詩序愛其文之慷慨悲憤激宕淋漓而深嘆秋史所遭之不幸歷下後秋史而起者又有此亭劉先生其詩足與秋史相頡頏而其所遭何其與秋史相類也先生幼穎悟康熙中涇陽劉西谷侍御視醵長蘆至歷下見而奇之攜入都與一時宗工哲匠遊所學並進而名亦日益起顧先生名動一時而阨於數又多與人情齟齬其應省試凡十餘次或不一薦或垂得矣已而復失不得已借脩脯之入以餬口徧

歷齊魯諸郡復之燕之趙之吳之越之楚之江右嶺
南率所遇不合而歸而先生一生所際之境遇與所
經之山川風土人情遂無不於詩發之其古體蒼鬱
豪蕩不受羈勒其近體新麗悽清神遊象外殆所謂
窮而後工者耶噫何其與秋史相類也秋史半生輒
軻卒晚得一官先生竟以選貢終其述遠視秋史殆
又過之而秋史無聊之意終未免芥蒂於中先生則
識量高遠胸襟蕭散更徃徃呈露於筆墨之表昔東
坡放逐困頓其夷猶自得之况猶可於海外諸篇見
之先生殆有其遺意乎蓋先生之詩素辦香東坡故

其神明亦遂與之相似而灑然自適也先生當西谷
侍御之歿繭足入都經紀其喪復求青州趙宮贊秋
谷文其碑文中所稱門生劉伍寬持行狀走千餘里
至乎太山之陰亂山之中請為文者也然則先生之
事師有始終其過人不獨以詩矣惜先生之詩不得
如秋史之遇漁洋為之鄭重而愛惜品題而揚詡之
耳雖然詩患不足傳果足傳矣則其性情與其聲音
笑貌雖奕世如接之三都之賦果借元晏一序而始

重乎哉

清寧集

韓章淡園遺詩

採訪節抄
本卷未詳

柳灝子正遺詩

同上

朱義倣夢村集一卷

採訪抄本

朱懷樸詩集八卷

董元度朱公家傳

懷樸有復齋漫稿桐社稿鷺浦集禹登山房詩家素

豪富工詩善飲而好賓客四方名士多與之遊歿後

曲阜顏次雷弔之云田文死後無賓客獨管齊山四

十秋

山左詩鈔

田渥枕湖書屋偶存草三卷

採訪抄本

申士秀曰露湛與劉此亭同負才名偃蹇亦相似遺

詩數冊如雲氣將垂野人家已近城香粳分瓦鉢老

杖倚青藤風弄輕涼披蝶粉泉流清淺見魚苗酒力
頻生微雨後春心不減落花時一路旗斜招下馬數
聲鳥嘯解提壺明春燕到窺書屋小院桃開憶酒人
筆似江郎春正麗人如荀令坐留香皆得詩人之致

山左
詩鈔

高瑾藉青書屋集十二卷

府志

張謙宜高君傳君致力學行舉業外習詩古文窺其
突奧著有藉青書屋集若干卷載在郡乘書法瘦勁

蒼逸自成一家

山左
詩鈔

高人策孝泉集

採訪節抄
本卷未詳

魏文深蛰吟集一卷

採訪抄本

朱崇勳桐陰書屋詩二卷

據本書

宋弼序畧曰怡園承世德濡家學資稟英異恬澹不
試無所見於時獨往往為詩以寫其懷抱所與唱和
若安邱張卯君淄川張榆村膠州張山農高南阜皆
一時老宿所為桐陰書屋詩清和醇雅足以振楓香
吳船諸集之遺響而先後於高張諸君子間

同上

魯鴻序畧曰其桐陰書屋詩囊括衆美匠心獨運不
事鈎章棘句而自見其淵然而光蒼然而秀蓋學古
而有得於心者之言非可襲而取其歷久而愈新無

疑也

同上

朱崇道湖上草堂詩一卷

坊本

朱令昭水明樓詩集六卷

採訪本

按令昭有黃華集闕遊集各若干卷歿後子攸彙

鈔之為六卷

蔡調元曰朱氏才氣倜儻如神駒出水跼蹐不可羈

勒其喜躡昌谷蹊徑馳坑抵巇未若奔放坦迤頓宕

崛竒足自成一快

歷城三子詩序

法坤厚黃華集序曰黃華集一卷濟南朱次公先生

作也先生才氣超絕一時性簡傲不喜與俗子遇家

趵突泉畔結柳莊詩社約同人讌集好為險韵相窘
揮毫為左右手書畫賦詩灑灑千言立就旋依胡牀
揮檀板斑鼓抗喉高歌作清商流徵之曲聲窮窈眇
聞者莫不悚息傾耳淒其欲絕詩名才氣飛騰藝苑
益自矜詡與流俗隔迕以故流俗輩哂之切骨居久
之意不自得家貲巨萬金略盡乃攜蒼頭策蹇渡黃
河下金陵徧遊閩粵名山大川無所遇歸而先生亦
旋沒矣予素耳先生名恨不及見今年來濟上先生
從孫式魯予同學友也持是卷屬序且曰先生生平
為詩最多不自收拾此卷所集不及百一取而讀之

才氣縱橫體大而思精如終南進士行則昌谷之奇
詭也楊花曲則玉溪之瑰麗也讀太白集釣突泉則
青蓮之奔逸閩中歸來諸作則少陵之悲壯也盛陵
序蘇子美集曰斯文金玉也沈埋糞土中其光氣常
焰發於上必有識而物色之者謹序其卷末以歸式
魯可善藏之以待異時之求也

白石山人集

冰壑詩餘三卷

採訪抄本

朱倬稽愁吟一卷

同上

倬字振亭令昭長子

張希傑鑄雪齋集十五卷別集八卷

同上

按希傑有不其集皖江詩草嶺南集五夢唱和詩
歷下秋聲共若干種

宋弼序畧曰張子少負才名受學大師數為名公大
吏所知賞歷試不待一遇生平遊跡半天下坎壈骯
髒抑鬱無聊之氣一假筆墨以發之是必有陸離光
怪藏乎其間宜其傲睨一世而若有所不屑也

據木書

法坤厚序畧曰言者心之聲也詩三百篇類多窮愁
憂怨之音先王不禁其憂怨而采之為其發乎心之
不容已也予友張子練塘少負異才乃蹉跎五十餘
年生平知交悉騰達以去而練塘屢躋場屋以諸生

老此其才之所抑心之所鬱固有不能已於言者而
頻年僕僕道路幾數萬里其足跡之所越歷風檣劍
棧幽壑雲巖又極乎宇宙之險阻適足以發其胸中
磊落奇偉之氣故凡耳目所經古今興亡孝子忠臣
之蹟山川河岳風雨雷霆草木鳥獸以迄神仙鬼怪
之事苟有所觸靡不發之於言以寄其懷抱久之彙
而盈尺名曰鑄雪齋文集共若干卷其言可謂富矣
而孰知其心之苦哉辛巳秋予來歷下練塘出其集
屬為刪定且曰吾將錄藏以俟來者不願以示世人
也嗚呼抑逸世之才無所使布而區區托之吟咏爭

存亡於塵埋蟲蝕之餘以俟千百年後悠悠不可知
之人此其志愈苦而言愈悲矣然吾謂天地同此通
塞之氣人世同此得喪之境也練塘處抑鬱之境而
能曲暢其氣發之言而先得其自然之聲其必有與
為同調讀是集而為之痛哭流涕所謂得一知己可
以無憾者則千百年猶旦暮也又況其詩其文離陸
奇瑰固有令人一見擊節者自可出以問世而無待
於後哉然則人固不必以不遇為練塘惜也乾隆辛

巳仲秋

白石山人集

錦囊集韻註四卷

採訪抄本

趙國麟序畧曰明楚中蕭漢冲先生著龍文鞭影四字文一帙門人張生希傑篤志績學讀書務求會通已亥客墨水得是書愛惜編次句為疏解殫精粹智閱五載成書易其名曰錦囊集韵乾隆元年七夕本書

邢

各未詳

鵲華烟雨集一卷

劉藻序畧曰雍正甲寅之夏邢子銓以其伯氏聿修遺詩一卷問序於予予素不能詩然嘗讀一過覺數十篇中體製不一大率皆情炎於中而景之所觸隨地湧出固非不悲而啼不歡而笑強我從詩者比也

嚴滄浪論詩惟在興趣邢子世家濟南其伯氏以風雅才攬鵲華山水之勝春風秋雨弔古懷人一切形之於詩是於興趣之云蓋亦有得爾矣讀既終卷遂

次數語冠於簡端

萬愛堂集

任宏遠鵲華山人詩集一卷

據本

于振序畧曰鵲華山人者漁洋先生所稱為春草秀才也山人弱冠時有春草碧色詩見賞於漁洋謂可與王黃葉齊名東省鹽法志載任子灤湄工詩文所著有鵲華山人集見山亭集南游草海上集西征葉覽勝集山亭雜記鈞突泉志信乎為山左之文獻而

黃葉春草之果足以輝映後先也

同上

方起英獅山詩鈔四卷

據本書

桑調元獅山傳起英著有東園集蜀山前後集絳雪

詞古今詩塵藏於家

殘甫集

三子詩序方氏強年始為詩發聲高亮脫去塵科而

儻栖動莊舄之吟時覺蒼涼惻耳

歷城三子詩

朱曾傳式魯詩集

卷未詳

歷下同年朱式魯蒙於酒詩近李長吉其鏡歌云天

雞樹下日如血西樓耿耿明河滅蠟淚流殘妝未成

獨把海綃拂秋月蘭笑蓮啼各不免鏡中紅翠流年

轉七十鴛鴦俱錦毛憑誰持照思深淺置之昌谷集
中無以別式魯詩才提敏篇什甚富臨歿胥焚之就

余所見者錄此一首亦豹之一斑也

盛百二續
袖堂筆談

張永清歷試存草一卷

採訪
抄本

徐士梅論文瑣言三卷

同上

士梅縣諸生集師友談讌之語為論文瑣言一書

頗有心得

孔麗貞鵲吟集藉蘭閣草

採訪節抄
本卷未詳

麗貞藉蘭閣草自序曰境有順逆固不能強諸天情
有悲樂亦不能必諸己予幼居深閨中二親傾復朝

久不離左右每花晨月夕吾父與伯兄共四方執友
流連詩酒竟日方休吾母春則烹新茗夏則設盆冰
秋則焚蘭香冬則煮佳釀以待吾父歸來彼時予同
長兄怡怡侍側天倫之樂至此為極故有雙親兩意
同之句未幾長兄謝世予賦于歸結襦一載夫君與
幼弟相繼淪亡於一月之中我父我母復棄予長逝
於八年之內人世之苦亦莫此為極形之墨滿者亦
遽易喜為悲矣情隨事遷意緣境移不信然乎哉至
若往來於歷山灤水偶有吟咏無不可於悲樂間分
之此小集之大概也癸卯春紅萼軒長兄憐予苦衷

解囊付梓告成之日予始得知紅萼兄叙於前怡齋
兄跋於後既感且愧竊恐世人見之譏予苦不揣固

陋爾

山左
詩鈔

歷城縣志卷第二十二終


歷城縣志卷第二十三

金石考一


集金石之文者始於歐曾至趙而博至洪而專矣其餘
朱長文婁機陳思鄭樵都穆楊慎趙崡于奕正之所編
纂或有錄無文或僅論書法其能抉摘史氏之失而有
資於考據者蓋不多見焉近世崑山顧氏秀水朱氏辨
証號最精惜於宋元以後闕焉弗備夫今日之視宋元
明猶歐趙之視漢唐也其可弗著於錄乎予嘗有志蒐
羅而無其力茲就縣中見聞所及摩鈔而次第之自漢
迄元無所遺明以後則擇其有關縣事者以備一方掌

故非能於史傳有所發明也而姑論之如此作金石考
商

濟南鼎文一



濟南鼎文二



濟南鼎二向瀦傳本

薛尚功歷代鐘鼎彝器款識法帖

右二銘字畫奇怪未容訓釋以鼎出濟南姑以名之本以一器緣傳寫不同未詳孰是聊並存之

同上

薛尚功鐘鼎款識第二卷有濟南鼎二其文如五岳正形圖此吾郡典故也然二鼎今不知所在或已入

宣和內府矣

香祖筆記

漢

趙相劉衡碑

中平四年四月

文見古蹟考

右漢趙相劉衡碑云君諱衡字元宰濟南東平陵人

也厥先尚矣聖漢龍興其下殘缺又云爰啟冀土遷
於岱陰自康侯以來奕世丕承又云敕海王帝之冢
弟不遵憲典君以特選為郎中令以兄琅邪相憂即
日輕舉州察茂材除修令遷張掖屬國都尉以病徵
拜議郎遷東口屬國都尉不行拜趙相在位三歲拜
議郎年五十有三以中平四年二月戊午卒其四月
已酉葬其餘文字完好者尚多按後漢書勃海王名
惲桓帝弟也

金石錄

右趙相劉君碑在齊州歷城縣劉君名衡字元宰為
勃海王郎中令察茂材除膺令歷張掖屬國都尉議

郎遼東屬國都尉趙相再為議郎以靈帝中平四年卒碑云勃海王帝之冢弟不遵憲典君以特選為郎中令勃海王名悝威宗之母弟也靈帝紀熹平元年書勃海王被誣謀反自殺曹節傳云節與王甫逐捕朱雀闕誹書人不獲誣奏勃海王誅之宋后傳載靈帝夢威宗曰悝已自貶又受誅斃今訴於天上帝震怒帝以問許永對曰勃海處國奉藩未嘗有過曾不證審遂伏其辜如史所載則勃海死非其罪以作碑者附會時論辭有益惡然威宗紀延熹八年書勃海王謀反降為瘞陶王後二年復舊則勃海亦非身端

行治者癭陶既已覆車不能率德遷善遂罹戮之
禍哀哉孝靈之夢則齊諸家所志也碑以范為範碎
即卒字栞即刊字

隸釋

趙相劉衡碑無額碑云遷蜀國都尉不行拜趙相金
石錄與隸釋俱作趙相劉衡碑

顧藹吉
隸辨

樂安任照先碑

東平陵縣城東門外有樂安任照先碑

水經
注

天生自來泉石刻

皇覽商太甲陵在歷山塚旁有甘露井石鐫天生自
來泉五字乃古銘也

酉陽
雜俎

按皇覽作於魏文帝則所謂古銘者其來遠矣姑附於此

元魏

韓麒麟碑

歷城縣魏明寺有韓公碑太和中所造也魏公曾令人徧錄州界石碑言此碑辭義最善常藏一本於枕中故家人名此枕為麒麟函韓公諱麒麟西陽雜俎

按魏書本傳麒麟參征南慕容白曜軍事進攻升城師人多傷及城潰白曜將坑之以麒麟諫而止齊人大悅白曜表為冠軍將軍與房法壽對為鎮

州刺史後為齊州刺史假魏昌侯麒麟在官寡刑
罰從事劉普慶勸以斬戮示威麒麟曰刑罰所以
止惡蓋不得已而用之今民不犯法何所戮乎若
必須斬斷以示威當以卿應之普慶慚懼而退又
表守宰有闕推用土人俾華族蒙榮良才獲叙蓋
卒於官而寮屬豪家為之立碑其製必精故魏公
寶之如此耳然自歐陽公已不著於錄則其亡久
矣

齊州刺史拓拔子華頌德碑

父陵伯萇子子華字伏榮襲萇爵奉莊初除齊州刺

父先是州境數經反逆邢杲之亂人不自保而子華撫集豪右委之管籥衆皆感悅境內帖然在官不為矯潔之行凡有餽贈者辭多受少故人不厭其取鞠獄訊囚務加仁恕齊人樹碑頌德後除濟州刺史介朱兆之入洛也齊州城人趙洛周逐刺史丹陽王蕭贊表濟南太守房士達攝行州事洛周子元顯先隨子華在濟州邀路改表請子華復為齊州刺史

魏書
神元

平文諸帝
子孫列傳

按子華官刺史無與於縣而其碑宜在境內故錄之又趙洛周及子元顯齊州人事不足立傳姑俾

附見於此

不醉不歸四字

舜祠東有大石廣三尺許有鑿不醉不歸四字於其

上公曰此非遺德令鑿去之

酉陽雜俎

按段成式所謂公指魏收也不知石何年刻姑附於此

東魏

龍洞造象記

大魏天平四年歲次

缺

朔廿□

日庚申使持節

缺

侍驃

騎大將軍關

缺

尚書

缺

涇涼華□

南

缺

九州刺史汝陽

王曰叔缺敬造彌勒像一軀缺七層皇祚永隆四缺合

生之類普登正覺車騎將軍左光祿大夫缺州長史

乙伏銳征北將軍金紫光祿大夫缺

右造像石刻高八寸寬一尺四分文十一行

行十字字徑五分正書後有張永康王舜居六大

字為後人所刻在城東南三十六里龍洞後門口

北向

隋

齊州刺史唐恭墓誌開皇二年

右碑近人於龍山鎮東南掘地得之文畧見古蹟

考土人旋掩之實以土故失其全文

龍山鎮外石人坡又有一碑存者僅數十字葬者之姓作適字不識何時附記於此

開皇三年五月八日騎則苟祭席威來禮拜觀

附

右題名三行首行八字次行六字三行四字字徑寸許正書墨蹟在龍洞後門口北七十餘步石崖下北向墨書字例不載然開皇三年距今千有餘年矣以風雨不及故墨蹟尚存亦天壤間奇物也則字疑本射字騎射官名苟祭人姓名席威疑其字來禮拜觀當謂上層佛像而路險不可到不知

何年所造後墨字甚多皆剝蝕其隱隱可讀者有
碧峯危岫四字又有淳化元年四月二十八日十
字俱墨書因牽連及之

鈐珍墓誌

濟南行記王舍人莊道旁一石刻云鈐珍墓誌誌文
鄙陋字以巴為已蓋周隋以來俗書傳習之弊其云
葬岫山之西者知西南小邱為岫山也以歲計之隋
開皇六年丙午至今甲午碑石出塋中蓋十周天餘

大衍數也

遺山集

比邱尼靜觀等造像記

大隋開皇七年歲次丁未口月癸酉朔十五日丁亥比
邱尼靜元比邱尼洛法洛口比邱尼僧欽比邱尼僧妃
比邱尼智最清信女姚姬清信女趙文姜等敬造釋迦
像四軀彌勒佛一軀上為皇家口口及七世師僧父母
現存眷屬法界有形咸同斯福清信士女孫白諸

右石刻高一尺二寸五分寬一尺二寸文十行行
十一二字字徑寸許正書在東佛峪懸崖

僧智照造像記

比邱僧智照供養

右七字一行在佛龕之左

大業三年十月十八日智照敬造日除上日父母
口口

右共四行在佛龕之右龕內佛坐像一高一尺二
寸許侍像二高九寸許記刻於龕外兩列俱正書
字徑六七分在龍洞後門口北六十餘步石崖下
南向

唐

房元齡神道碑 褚遂良書

右碑在龍山鎮見陳思寶刻叢編○按元齡不葬
於縣神道碑不知何以在此姑錄之以備考

神通寺千佛崖造像記二十種

缺虔供缺有隣禪桑門僧沙棟缺響莫異缺在缺國書

傳記缺大唐武德缺厥年七十缺哉陟之缺恩

右十行三十字字徑七分正書

大唐貞觀缺八年僧缺德知風燭難停熾缺迨越竭衣

鉢淨缺石像兩軀上報缺識瞻顏禮缺罪名至心嘆缺

業報恐缺處缺變缺石記缺銘缺於後

右九行僅存四十五字字徑九分正書

永缺年缺月為天災澤側缺諸村史缺王元缺百餘人

等缺世澤缺設齋造像

右七行僅存二十三字字徑五分正書

顯慶二年南平長公主為太宗文皇帝敬船像一軀

右三行十九字字徑七分正書

大唐顯慶三年九月十五日齊州刺史上柱國駙馬都尉渝國公劉元意敬造像供養

右三行三十三字字徑一寸正書

大唐顯慶三年行青州刺史清信佛弟子趙王福為太宗文皇帝敬船彌陀像一軀願四夷順命家國安寧法界衆生普登佛道

右六行四十九字字徑八分正書

文明元年四月日趙旡妻羅為父敬造石佛一軀

右六行二十字字徑五分正書

陵感敬造彌陀像一軀

右九字字徑九分正書

像主前接陟上騎都尉劉君操供養

右二行十四字字徑一寸正書

像主劉操亡妹順妃供養

右二行十字字徑八分正書

像主王元亮被蠱魅得差船像設齋願合家平安法界
衆生咸同斯福

右三行二十七字字徑九分正書

像主清信女段婆為父母敬船一軀

右十四字字徑八分正書

高道口為比丘尼真缺沙彌感師敬船像一鋪普及法

界眾生咸同斯福

右三行二十六字字徑九分正書

李樹生敬船像一軀缺子缺

右二行僅存九字字徑一寸正書

口毛德供養德妻田供養

右二行九字字徑七分正書

像主周世軌為父母敬造

缺

右二行僅存十字字徑八分正書

口主陶口建為亡兒敬造像一軀

右二行僅存十一字字徑八分正書

恭禮聖像張直方題

右八字字徑八分正書

僧慈蔭為母

缺

元年記

右僅存八字字徑九分正書

缺月廿二日

缺

是觀為

缺

道場

缺

洞

缺

四禪寺登奉同

弟天粹

缺

濟南沅君王平原

缺

右十行僅存二十六字字徑八分正書

按神通寺千佛崖造像記凡二十疑皆唐時刻也
其有年號者武德一貞觀一顯慶三文明一其僅
存永字者蓋永徽也餘無年號而懸崖最高處題
名尚多惜未盡摩搨寺在城東南八十五里

歷城令劉文恪清德頌

正書無書撰人姓名總章二年

金石錄

按通志金石略作彥恪云在齊州

齊州刺史薛寶積清德頌

正書無書撰人姓名總章二年八月

金石錄

李白詩石刻

華不注山前道院中有石刻太白諸賢詩

齊乘

齊州刺史封公德政碑

李迥秀撰李思憚行書

金石錄

按通志金石畧作封禪德政碑又訛思憚為思憚

云在齊州

佛峪造像記

大唐乾元二年佛弟子遇緣為國王帝主大地苦衆生
敬造阿彌佛一軀三月五建

右字四行行九字字徑五分正書在城東南三十

餘里佛峪寺西北懸崖

金剛會碑

開成二年四月

大唐口金剛之會碑

石彌勒像讚并序

齊州歷城縣維那劉長清等八人為口中金剛經邑會之長曾同邑內信直者十數公俱理南靈臺山禪大德僧口方為出世之師師以大和六年受靈巖寺請命詣闕進本寺圖將謝聖旨再許起置鎮國般舟道場之鴻澤師行能二備慕止京畿首末三秋無疾而謝世維那劉公等痛患焰絕照法鏡沉光無明益昏大道荒塞乃率邑內諸人等家財同心奉為口故禪大德建此彌勒

像一軀侍菩薩兩軀於南靈臺山先師安坐之地上答
生前法誨之恩惠矣口先身得授佛記菩薩號問逸多
今為次上四天天中最滿無上妙解脫正真理補處一
口攝用歸於圓寂無數天人隨其六事行果聞見親疎
近者熏其口種清淨至不退地遠者著快妙樂天福盡
還墮廻五十六億萬歲滿降生閻浮當翅頭末地孕大
妙梵婆羅門舍口口生長少厭塵跡悟无常无我因寶
臺起觀知了竟終空灰心滅智證無生度能人正像末
遺法白黑弟子口百八十二億數曰慈氏如來既彌勒
佛之本稱器界攢縮草木芬香環海抽銷濤湧澄徹一

時七寶人壽過仙迷浮覺休坤成金色有輪王出興號
儀伽與口及口嬪等皆墮髮修空迷證道果雞口山為
之峯裂迦葉波定盡捧釋氏口口授慈氏竟化火而
謝僧尼女男万万計俱發無上道意故今之刻像已口
未來彌修口佛之良因同冀入龍華之大會者也 茲
日鍊行三祇劫當來證法王四維千万土一口口三臺
光下界牢籠罔天口歲月長衆生淪溺苦俟降竺乾方
開成二年歲次丁巳四月甲午朔功德主及都維那
邑人等一百一十人結金剛經會每會書經一卷每至
正月十八日九月十五日設齋一中以表衆緣標於此

碑院主僧行勤

功德主劉長清

都維那王昇朝

維那劉君義

維那劉征品

維那李士良

維那張

敬宗

維那王士義

維那李綰

維那張少林

僧

元忠

僧楚文

僧居政

僧思口

僧廣口

僧簡

裕

僧善

尼體幽

尼元口

尼志堅

尼堅行

邢忠信

楊再清

趙孝恭

孫再榮

仇智昇

李公弁

邑人蹇秀誠

田清

趙西華

高進玉

段恭

李榮

高行

韓良季

尹懷珍

侯君集

丁少陽

曹良祐

李全義

李玉山

高文弼

左

裴柳

口口

劉維義

殷常省

魏少寂

王如山

王君祐 徐良祐 趙廣陽 宋口俊 李惟寬

鄧湛 宋佇 郭士清 趙國進 高慶 劉惟讓

田文宗 榮日華 房惟晟 王義成 孫允 詹憲

朝 高文素 馮端 田欽晟 劉文會 張如雅

吳進明 李文真 李重昌 李餘 董日榮 朱寶

山 劉元甫 劉維和 段良茂 段良口 張友信

嚴憲 張口 李清 趙維義 孫行素 王士慶

翟沅 鄧懷義 口良祐 口口信 侯重興 陳

公升 史口豐 郭明口 劉宗口 劉惟會 段良

義 張文遇 李輔國 張幹 王倩 榮法口 郭

達 吳士林 王進義 周忠信 李方迪 梁如臬

李文慶 張廷玉 高友成 翟公信 徐令芳

劉元亮 劉惟忠 杜達 女弟子等 清淨海 蓮

花藏 功德性 素真 會香林 阿李 无亮恩

溫和 阿鄧 佛果圓 妙智 清淨口 常歡喜

淨花林 圓滿 如蓮花 九天花 心清淨 常自

在 阿李 觀自在 阿張 阿潘 修德 真如藏

常觀察 界香林 崔從口 孫佐元 殷王薩

王元濟 劉惟義 弟良恕 王口亮 張口政 宋

良臣 王良秀 弟良口 弟良口

右碑額篆書字徑寸許碑高二尺七寸寬二尺三寸上層文三十行行十七八字不等下層文二行餘八層皆題名俱正書碑額八字非篆非隸字徑寸許在東佛峪懸崖是碑額曰金剛會碑而題為石彌勒像讚自是兩事其像甚精至今丹碧之色不彫亦奇事也題名有蹇秀誠其人杜詩濟南名士多自注時邑人蹇處士輩在坐或謂後人偽為以此碑証之知當時固有蹇姓而公自注為不贋也女弟子有曰淨花林常歡喜如蓮花等名頗新麗宋元已後北方女子罕以小名傳矣

開元寺汰僧碑

濟南府開元寺因更修掘地得古碑蓋會昌中汰僧碑也字皆剝缺摩滅不可對惟八字獨存云僧盡烏巾尼皆綠髻僧惡而碎之後有詔改德士遂符碑云

江萬里宣政雜錄

瑞氣觀碑

見齊乘

五代周

齊州防禦使郭瓊頌德碑

郭瓊平州盧龍人周世宗時歷絳蔡齊三州防禦使在齊州民饑瓊以已俸賑之人懷其惠相率詣闕頌

其德政詔許立碑

宋史本傳

按魏晉禁私立碑銘其後禁弛而唐人諛墓及頌德政者尤多觀此則五代時蓋亦嘗禁之故民詣闕以請而後許立也

宋

齊州防禦使李漢超頌德碑

李漢超雲州雲中人宋初累遷控鶴左廂都校領恩州團練使從平李重進遷齊州防禦使兼關南兵馬都監在郡十七年政平訟理吏民愛之詣闕求立碑頌德太祖詔率更令徐鉉撰文賜之

宋史本傳

陳搏福壽字碑

右石高五尺七寸寬三尺四寸字刻兩面徑四尺
三寸福字旁有陳搏書三字徑三寸五分在按察
司土地祠內東側

真宗御製孔子贊

咸平六年七月

立言不朽垂教無疆昭然令德偉哉素王人倫之表帝
道之綱厥功實茂其用允臧升中既畢盛典載揚洪名
有赫懿範彌彰 癸卯年中元日立石

右碑高二尺一寸寬一尺二寸文六行行十二字
字徑一寸四分正書在府學大成殿內東側南向

歐陽修舜井詩石刻

詩見山水考

舜井有歐公詩大字石刻

濟南行記

右詩載本集而石刻已不見於舊志

曾鞏齊州北水門記

熙寧五年三月

文見建置考

曾鞏齊州二堂記

熙寧六年二月

文見古蹟考

右二碑久佚今存者乃明人重刻

曾鞏齊州雜詩序

熙寧六年二月

歷城縣志

卷第二十三

金石考一

齊故為文學之國然亦以朋比誇詐見於習俗今其地
富饒而介於河岱之間故又多獄訟而豪猾羣黨亦往
徃相攻剽賊殺於時號難治予之疲駑來為是州除其
姦強而振其弛壞去其疾苦而撫其善良末期囹圄多
空而枹鼓幾熄歲又連熟州以無事故得與其士大夫
及四方之賓客以其暇日時遊後園或長軒繞榭登覽
之觀屬思千里或芙蓉芰荷湖波渺然從舟上下雖病
不飲酒而間為小詩以娛情寫物亦拙者之適也通儒
大人或與予有舊欲取而視之亦不能隱而青鄆二學
士又從而和之士之喜文詞者亦繼為此作總之凡若

千篇豈得以予文之陋而使夫宗工秀人雄放瑰絕可喜之辭不大傳於此邦也故刻之石而并序之使覽者得詳焉熙寧六年二月己丑序

右見本集石刻已亡

蘇轍閔子祠墓碑

熙寧七年

右見齊乘詳建置考碑久佚今有明人重刻者

張挾讀書堂碑

萬歷初掘地得之乃宋龍圖侍郎張挾舊隱處也蘇

東坡書後移於縣庠橋門外

舊志

右碑高四尺五寸寬一尺九寸字徑一尺二寸正

書下有熙寧十年二月朔子瞻書十字字徑七分
正書舊在王舍人莊今在儒學橋門外北向

勅龍洞壽聖院六大字

右正書勒錦屏山北懸崖舊志云熙寧間蘇軾書
及諦視之初無書人姓名舊志不知何據

范純粹律詩石刻

右見濟南行記謂純粹有題張揆讀書堂詩考德
孺知滕縣在熙寧中而其直龍圖閣及知慶州皆
在叔文沒後疑未及交於叔文或是忠宣詩遺山
誤以為德孺耳忠宣題讀書堂七律一首載集中

若德孺有詩刻於石而忠宣詩不應反無石刻也

王臨跋神在一字碑

元豐三年四月

興德城南泰山廟東廊壁上神在二字世傳郭世先之筆命名先異固非凡俗所能為者因模刻石以垂不朽元豐二年四月初五日尚書兵部郎中直昭文館知軍州事上柱國王臨題

右碑高五尺八寸寬三尺三寸神在二字徑二尺五寸字畫奇古跋語在下其字三行字徑六分行書在城內舜井前東向碑後面又刻游神二字大小與神在字同

王臨題故龍圖侍郎張公舊隱讀書堂詩碑

元豐庚申五月廿日

詩見古蹟考 魏國王臨 興德平易堂大觀書

右碑高六尺二寸寬三尺一寸五分文八行行十五字字徑三寸六分行書題額王公口字徑四寸五分篆書在王舍人莊中大路旁東向齊州時為興德軍平易蓋州治堂名而大觀則臨之字也

元祐名士軒碑

見齊乘

東坡枯木石刻

元祐年

禹城于蔡東坡先生枯木記畧曰宋熙寧十年東坡先生過濟南寫枯木一枝於燃泉亭之壁後自書年

月日筆法遒勁枝幹虬結如龍翔鳳翥蓋先生一時
精思神會渾然天成有非世間畫工好手所能到元
祐間亭主劉招模石未幾復流浪於別館禹城王國
寶見之乃徙置於遠塵菴蓋大定二十九年也有常
山李彥文記之後不知何人移於儒學大成殿之左
壁及永樂東狩先生濟南筆跡漂蕩無存獨禹城僅
存此石往來士大夫求之者衆學中摩搨日夜不給
吏往往以此遭譴乃伺夜無人投其石於井中碎為
數段獨學中老蒼頭知之後歲餘白於學官乃發取
碎石仍置原處自是搨本皆有斷文吳大尹於原記

之末附跋數語正德癸巳羅山張大尹以石碎之故
不便於搨命工翻刻木板有老教讀者中添二枝以
補其缺視石刻雖較全而精神衰颯不及原筆遠矣
嘉靖甲午閩人教諭王某者貪昧無知忽語人曰吾
堂樹枯木學中其得有生意乎遂將先生原筆并朱
文公字刻及名筆數種俱棄於大門之外時值修造
尋命碎為柱礎識者追救無及嘗聞先生過常州報
恩寺會僧堂初成偶題於壁數語最為健妙後黨人
禍作凡先生之遺墨俱為除去寺僧乃預令厚紙塗
漆蔽之至紹興中詔求蘇黃墨蹟寺僧乃除去紙漆

以獻高宗大喜夫先生在當時雖人知敬重然追貶
遠竄不容在朝至口除去筆跡其惡可謂極矣而此
獨加珍重如此今天下學士大夫存先生片紙隻字
不啻若獲拱璧而此人獨棄毀之是何其見反是僧
之不若耶予嘗欲於故家求原刻勒石以垂永久而
力有未能姑記之以俟好古君子嘉靖戊申秋七月

禹城
縣志

按東坡熙寧十年過濟南蓋自密州赴京師取道
於此集內有和李公擇詩是其時也亭主劉招不
知何如人考趙清獻公集有寄題劉詔寺丞檻泉

亭詩招蓋詔之訛耳

三壇寺宰堵波銘

紹聖五年二月初十日

齊州歷城縣三壇寺阿彌陀佛宰堵波銘并序 神通

寺住持福勝寶山 玉福玉祿玉正玉俊 補陀子潘

卞撰 應鄉貢進士馮睿書 阿彌陀佛宰堵波者比

邱福林為父母所造也福林俗姓鄭父諱朝宗素學儒

經稱為長者元豐五年六月二十四日卒於俗舍年七

十五時當溽暑及殮浹旬顏色如生蠅蚊不近良福善

之所感也母畢氏持齋事佛布施勤約元祐六年前八

月初四日卒於俗舍年七十六老染微疴雖修懺悔良

順生所報也福林姊福燈頭陀苦行大戒卯齋茶毗其
骨負之推置於福林受業齊州歷城縣神通三壇寺俾
近四門石塔東北隅三十餘步就山鑿石成瘞坎以藏
之運盤石以覆之起七級窣堵波以表之龕阿彌陀佛
以事之求舍利以鎮之始於紹聖三年六月初三日弟
三級功畢成於其年月日皆悉資薦考妣以求冥助也
補陀子湍卞尉於茲邑福林者適當營建之將成哀懇
求銘并序始末既素與善之又義其孝思獨力成辦乃
為作銘銘於塔曰號無量壽四十八願普度羣有罪滅
口逢樂資無垢福林建塔上為父母一善從心千佛授

手劫火雖焚此塔不朽 李道刊

右三壇寺塔銘字三十九行行十五字字徑一寸

正書在神通寺東南半里青龍峽塔座上南向

勅封順應侯牒碑

元豐二年七月牒
元符三年六月刻

勅封順應侯碑

右額篆書六字字徑五寸

中書門下牒

右第一行行書字徑四寸中書二字以一直貫之
門下二字合為一又間兩字地而後為牒字

太常禮院奏准中書批送下度支郎中知齊州韓鐸奏

狀十一月二十五日准京東路轉運司牒准中書劄子
節文自冬以來並未曾有雪邊山田麥苗已覺愆潤右
奉聖旨宜令京東轉運司訪尋管下名山靈祠所在委
長吏精潔躬行祈禱臣尋虔奉朝命於十一月二十六
日寅時躬親齋潔詣本州界內龍洞山祈禱及已具狀
申奏去訖至今月初五日已獲降雪據歷城縣狀并在
州諸廂狀申於本月五日巳時下雪至當夜子時止約
五寸已來具狀奉聞所據歷城縣并在州諸廂狀申降
到上件時雪寸數備錄在前臣今勘會本州龍洞山去
城三十餘里靈跡殊絕巖崖雄峻環瞻氣象肅然可畏

洞內有如石屋延亘通徹約一十八間內雖安設神龍像位而廟貌未正不足以行禮前來守臣亦曾往彼祈禱無不獲應州人蒙賴陰救愆災欲乞朝廷以此名山神物所宅每當久旱屢有靈感特加旌顯賜以封爵寵報神休俯慰齊民欽奉之意伏望聖慈特賜開允候勅旨狀前批送當院者當院看詳齊州龍洞山龍王洞雖圖經不載又緣祈禱有應合封爵號伏候勅旨 齊州龍洞山龍王洞

右十一行行五十六字字徑寸許正書

牒奉勅林嶽洞壑萃山水之秀則宜有神物宅於其間

方苗沴旱乾百穀之仰雲雨皆可以禱而獲也惟爾龍
洞為齊人望祈罔不答何可勿崇爵於列侯冠以嘉號
用厚薦報永享光靈宜特封典應侯牒至准勅故牒元
豐二年七月日牒

右五行行三十二字字徑二寸五分正書惟二勅
字徑六寸許行書

右諫議大夫叅知政事蔡 禮部侍郎平章事王 工
部侍郎平章事吳

右最末一行字形畧扁正書此碑高九尺九寸五
分寬三尺六寸六分字大小不一皆已詳注而右

諫議大夫叅知政事祭者確也禮部侍郎平章事
王者珪也工部侍郎平章事吳者充也以宋史筆
輔表考之充珪皆內平章事碑在壽聖院中南向
順應侯碑陰記 元符三年六月十三日

文見古蹟考 李元膺記 朝散郎通判齊州權發遣
軍州兼管内勸農事驍騎尉賜緋魚口何維立石

右碑陰記文二十行行二十七字字徑一寸二分
行書額字徑四寸正書勒勅牒碑陰

崇寧賜碑雍詔碑

大觀御製碑

憲府東宣聖廟有宋崇寧賜辟雍詔大觀御製政和

手詔三碑在焉

齊東

按大觀碑山左學宮往往有之蓋通天下皆立者
蔡京題額曰大觀聖作之碑以御製為聖作猶以
公主為帝姬也碑與崇寧賜辟雍詔碑皆亡矣

吳拭等佛慧山題名五種

崇寧十年六月知州事吳拭同僚屬會食佛慧山飲茶
泉上 大觀二年三月知州事梁彥同遊者六人 政
和四年三月知州事蔡居後七人勸耕於此飯寺中
五年七月季德修五人就甘露泉試北苑茶 七年二

月張勣深九人登覽

右五種俱舊志所錄如此且云今崖壁崩墜題刻
不復可辨而予遣人搨摹猶存梁彥張勣二種其
錄於後張勣字深道舊志誤以為張勣深矣

梁彥佛慧山題名

大觀二年三月八日左散大夫知州事梁彥純之來遊
與會者六人朝請大夫新差知濮州武安國元禮朝奉
大夫新差知金州張朴聖缺朝請郎李格非文叔缺議
郎向沈伯武節度缺書記李機文淵錄事叅軍宋昭叔
明

右字十行行九字字徑二寸行書在佛慧山南崖

北向

張勣佛慧山題名

政和二年仲春既望張勣深道招王勤無逸張仲綱彥
正杞世寧延國王有方承之韓思永子長洪炎王父周
洵彥直史安民惠叔同瞻石龕大佛口登覽晚還城中
右字八行行八字字徑一寸行書勣佛慧山南崖
北向

報恩塔碑

政和六年四月

報恩塔記

林棟開元寺東大聖院講經論僧宗義行

歷成縣志

卷第二十三

金石考一

三

業特異所在有聞意會三界拘碍邪宗莫能越六道升
沉世智不可逃使三界不能拘碍六道無以升沉一謝
迷津永登覺岸者惟吾佛之教也故恩若虛空無有限
量又念君以安治親以生育師長以誨導檀信以資給
此恩不報何德可酬遂罄所有於齊之龍洞山寺鷲棲
巖頂募舍利數十粒起石塔七層置觀音像於龕中又
盡以昔日講經論讀誦功德迴向報恩故名之曰報恩
塔以成其志也當知登是巖瞻塔禮像者知恩不可忘
則忠孝庶恥之心不待勸而發矣况明眼洞照之士觀
晴天烈日殊非外物層巒秀嶺皆出自己色圖淺深縱

羣花之閒落聲傳遠近任幽鳥之去來萬異千差惟一
真界則又以法報恩者也今集新勝利上祝聖壽無窮
法輪常轉更願父母師長一切含靈同登極樂親禮彌
陀時政和六年歲次丙申四月吉日濟南王澄記 修
塔講經論僧宗義 龍洞山管勾僧德彥 歷下徐儀
刊

右石刻高一尺四寸寬二尺二寸文二十行行二
十一字字徑五分正書在龍洞東南驚棲巖塔壁
東向

政和御書手詔碑

八年十月

朕承祖宗遺休餘烈崇經術設學校興賢能以待天下之士高爵重祿承之庸之以待士之任官者蓋與之修政事理人民以立太平之基致唐虞三代之隆宜有豪傑特立之材忠信志義之人比肩相望焜耀一時為世盛事而比年以來懷僭亂之異謀干殊死之極憲者如趙諗諸侯王家劉昺之徒或賢科異等勲閥世胄或出入禁闥侍從之領袖為搢紳士大夫之大等間巷無知愚夫愚婦之所憤疾武夫悍卒未嘗知書者或羞道而喜攻之其故何也豈利心勝而義不足以動之歟抑勸導率勵之方有所未至歟夫經傳所載君臣之分忠義

之訓榮辱禍福之戒豈不深切著明今誦其言而不能
効之行事深慮薄俗浸漬士風陵夷失崇養之指害教
化之原為天下後世笑卿當師儒之任以學行致大官
其思所以勸勵興起畀知尊君親上之美無復暴戾邪
僻之行以居德而善俗以化天下與後世稱朕意焉故
茲詔示奉行無怠

李邦彥

右上層字二十二行行十六字正書額字徑八寸

正書

政和八年夏六月上親御翰墨作訓於四方多士以其
詔勗臣邦彥使奉行之秋七月被旨揭示於大學暨辟

靡仍著之石九月臣以職事進對便朝上諭臣曰前日
詔書學者宜識所以訓迪之意且暴戾邪僻豈士人所
為臣頓首謝曰陛下興學造士澤之人人深矣孰不能
患上德而化之聖詔一頒鼓舞不應咸目俞而心成咨
嗟誦詠者不可一二數憤激而勸之義者慨然相先也
蓋教育之道素明而理義之感人若是其敏願詔儒臣
作記以揚勸休蹟俾天下後世無忘其章越二日御筆
委臣識之而臣疏逖一介擢長師儒毫髮未報宸翰所
及獎飾踰分眷任之意不替益專且不以燕累取玷上
寵卹加序述惟是不腆末學固不足以辱命而載名其

下有榮耀焉臣之幸也謹拜手稽首而言曰臣聞三代之學皆所以明人倫人倫治化之本義命之大戒存焉士之所學學此者也上之所教教此者也政事之興風俗之醇皆原於此周豎二代禮樂庶事備矣而教養之法加詳法象所示雲漢其章人才之成金玉其質拔竒取異序爵而官使之名正分辨口慙嘉德故服事其上而下無覬覦羔羊節儉正直之風有辭於永世知所以尊義而立命故也治降叔末君臣信義之論策名委質貳辟之責口行於區區戰國之間時以為美談豈餘波遺澤燕及來葉而人倫之教在人心者未熄耶止以神

明淵懿之資發揮前聖光大之烈勵賢崇化一本於學
所以風天下而善萬世者二代不足進也邪謀弗臧既
底於憲而訓詞諄切必勤勤於庠序師儒之官宸慮所
圖至深且遠矣譬猶慶霄清明白日中照有目有趾者
待是焉顧非甚愚孰不知嚮是知革心滌慮祇奉明德
戒懼而不敢少易也嗚呼士之取重於世者以義命在
我物無待而移之故尊君親上之心常存而不口口逐
末者義以利勝樂干時者命以故滅陵夷漸漬始失其
常心越乃誕作狂僭矯誣之行而階之為禍復旋之施
金柅之戒罔不在厥初則天心仁愛之篤形於詔諭其

為惠可勝既耶書曰王言惟作命不言臣下罔攸稟令
夫以九重之近幹制四海之遠德意志慮非言弗宣稟
令之臣所當奉以周旋靡遑夙夜矧奎章洛書昭布於
上下而又勒諸□□□範□來顧□敢不力□績文未
工愧無以形容聖作之萬一然戒告之嚴委寄之重尚
俾□者□怠於成以奉揚不顯休命億萬斯年之永則
是記也豈特侈上之賜使後世歆艷其美而已哉冬十
月己卯朔十五日癸巳朝議大夫試大司成同修國史
隴西縣開國子食邑五百戶賜紫金魚袋臣李邦彥奉
御筆記并書 保和殿直學士朝請大夫提舉上清寶

歷代通鑑輯覽卷一百一十一
三
錄官編類御筆兼禮制局詳議官校正內經同詳守官
汝陽縣開國子食邑六百戶賜紫金魚袋臣蔡脩奉聖
旨題額 奉議郎試辟廐司業臣李隲奉議郎試辟廐
司業臣程振

右下曾字二十九行行五十一字字徑一寸正書
其碑高一丈寬四尺八寸額高二尺許寬二尺在
府學西廡前東向齊乘云宣聖廟有三碑在焉今
存者惟此耳

龍洞題名九種

元豐戊午仲冬廿六日度支部中知齊州韓鐸奉朝命

以冬旱躬詣龍洞祈雪大理評事知歷城縣趙齊賢前
潁州國練推官李毅同拜祠下

右字六行行十字字徑二寸正書左讀石高二尺
一寸寬一尺五寸勒龍洞誠應岳側東向

誠應岳三大字

右字徑一尺八寸篆書下有篆字兩列尚書兵部
郎中知軍州事韓鐸命名元豐二年夏四月何洪
辰奉命書字徑一寸五分後有正書院主智全上
石劉守新刻十字字徑一寸石高五尺七寸寬二
尺一寸勒龍洞前門東崖東向

元豐二年二月八日知齊州事韓鐸再奉聖旨以春旱
禱雨靈祠前潁州團練推官李毅歷城尉李景隆陪謁
鐸題 男文炳文尉文通文仲侍行

右字十行行八字字徑二寸正書左讀右方下書
院主智全上石左方下書劉守新刻字徑八分正
書石高一尺七寸寬三尺五寸勒誠應嵒側東向
元豐辛酉四月二十日朝散大夫直集賢院知齊州范
純仁朝請大夫通判州事閔卬孝脩同謁順應侯祠朝
奉郎張起權齊淄二州都巡檢康詡承事郎知歷城縣
趙齊賢觀察支使孫述前潁州團練推官李堅歷城縣

尉李景隆從至

右字七行行十五字字徑三寸正書石高五尺三寸寬三尺勒仙人橋北獨秀峯上南向

朝請大夫通判齊州權發遣軍州事閤邱孝修宣德郎知歷城縣事單鎔觀察支使權通判軍州事孫述節度推官田備新定陶縣丞薄處厚司法叅軍陶聖臣同詣順應侯廟祈雨因遊龍洞至此男前賓州錄事叅軍頓新晉州司法頌堦進士高元溥孫男郊社齋郎琳次孫璋璫瓌琬侍行元豐五年三月二十六日元溥書

右字二十一行行六字字徑三寸正書石高二尺

四寸寬七尺三寸勒獨秀峯上南向

月晦日張頴子與李倚良輔范庭堅悅道劉琮元方李
佳美仲聯轡來游大宋崇寧二年六月

右字五行行七字字徑二寸五分清書左讀石高
二尺五寸寬一尺六寸勒龍洞誠應品側東向

華陽王有道口口夏侯景彥同明慧大師來游政和八
年五月十二日題

右字七行行四字字徑二寸五分行書左讀石高
一尺五寸寬二尺二寸五分勒獨秀峯南向

潘世美崔子明崔端禮張澤民癸酉歲清明日同遊

右字五行行四字字徑二寸正書石高一尺寬一尺二寸勒獨秀峯下南向按癸酉歲元祐八年也長樂張勸深道間農禱雨至龍洞大梁劉公彥君貺郡人張仲綱彥正韓思誠存仲杞世享延國李孝□□□□王有方承之絳郡史安民惠叔長樂李撰德修大梁宋宗年嘉紹□士玆彥威趙公回子發同來政和□年四月□日龍洞在府城東南三十六里山長而深獨秀峯最高峻其北為□門又高以峻至者必緣崖躡磴盤折而上祠橫山腰百數十步湫在後澗半里餘水色黝然人早不枯古傳黑龍淵云深道顯

右字十一行行十五字字徑一寸五分行書石高
二尺四寸寬二尺六寸勒獨秀峯下南向

大乘師演老品六大字

右正書勒獨秀峯南向

劉宗等題名

宣和三年四月十五日

濟南府長清縣天乾中管和平鄉稅戶劉宗妻么氏男
助教新婦大娘王氏孫男小哥新婦三娘耿氏次男小
二哥合宅再修塔須彌座伏保合宅吉慶眷愛平安上
祝皇王聖壽帝基永固住持管勾沙門僧淨義宣
和三年四月十五日畢匠人劉素馬友劉江

石字十一行行十餘字字徑五分正書在城東南

八十五里海羅峪村西北磚塔石座上南向

舜廟碑

見齊乘

岳飛詩碑

紹興五年秋

送紫巖張先生北伐

號令風霆迅天聲動北陬長驅

渡河洛直擣向燕幽馬蹠關氏血旗臬克汗頭歸來報

明主恢復舊神州

岳飛拜

右碑高七尺寬三尺三寸文六行行十二字字徑

六寸行書在濟南府署土地祠東側西向舊志云

樊太守時英掘地得此立祠祀之有銀屏夫人記

今其地為土地祠而記亡矣世傳武穆此詩及滿
江紅詞石刻在湯陰者已非真蹟此蓋明人翻刻
本後人多摹搨者重其人耳